

Celebracion di Mascaruba su di 45 aniversario ta sigui

ORANJESTAD-Mascaruba ta e grupo teatral mas bieu di Aruba, y nan ta celebrando dia 10 di April 2006 nan di 45 aniversario. Pa conmemora e ocasion special aki, nan lo tin un serie di presentacionnan special na TV, un exposicion y un obra nobo na Cas di Cultura durante e lunanan di Maart y April 2006.

Lo inicia e celebracion cu transmision na television di 5 obra cu Mascaruba a presenta den pasado. Esakinan ta obranan cu a ser graba hopi aña pasa y nan lo ser treci dilanti atrobe pa e pueblo di Aruba por gosa di nan. Lo presenta esakinan cu entrevista di algun miembro di e elenco haci na e Cueba di Mascaruba. E prome obra cu lo ser transmiti ta “Un Trabou Milagroso”. Aruba por bai bek den pasado teatral pa dos ora largo, Diaranson 22 Maart 2006 pa 9:00pm

via Tele Aruba. E obra aki a haci un impacto grandi nan Aruba y ta ser considera un di obranan mas popular cu Mascaruba a presenta.

E siguiente obra cu lo ser transmiti ta “Luz na Horizonte”. Aruba por gosa di esaki Dialuna 3 di April 2006 pa 9:30PM na Tele Aruba. E obra aki ta trata un topico hopi serio y e actornan di Mascaruba a presenta esaki di un forma hopi professional. E di tres obra cu Mascaruba lo presenta na television ta titula “Ken ta keda cu Mama”. Esaki lo ser transmiti dia 10 di April 2006 pa 9:30pm na Tele Aruba. Aruba a keda masha contento cu e obra aki ora cu e la ser presenta. Awor nos por rebiba esaki atrobe via television. Tambe e obra teatral “Droga” ta uno cu a causa hopi impacto ora cu Mascaruba a presente. Aruba

por wak esaki Dialuna 17 di April 2006 pa 9:30pm via Tele Aruba. E ultimo obra cu Mascaruba lo presenta via television ta “Otro Gai ta Canta” y esaki ta priminti di haci e mesun impacto atrobe ariba nos hendenan cu e la haci ora cu Mascaruba a presente den pasado. Esaki lo ser transmiti dia 19 di April 2006 pa 9:00pm via Tele Aruba. Hopi ta e obranan cu Mascaruba a presenta durante e ultimo 45 añanan, pero ta solamente algun nos por mira na television.

E celebracion di e di 45 aniversario di Mascaruba ta continua cu e gran premiere di e obra nobo “Señora Zapate”. Esaki lo tuma lugar dia 21 di April 2006 na Cas di Cultura. E obra aki lo core dia 22 y 23 di April 2006 tambe. Na ocasion di e Premiere dia 21

di April, Mascaruba lo habri tambe un exposicion nan Cas di Cultura, dedica especialmente na e 45 aniversario. E exposicion aki ta priminti di bira algo spectacular. E exposicion ta

ser haci conhuntamente cu artistanan local renombra na Aruba manera, Elvis Tromp, Edmond Tujehut y Maria Theresa Martinez. Pa e exposicion aki, miembronan di Mascaruba encabesa pa Ivonne Spellen, tambe ta contribui na trece e historia di Mascaruba dilanti. Nan lo trece dilanti nan logronan y exitonan den un forma unico y masha especial. E artistanan menciona ariba ta encarga pa expone “Mascaruba 45 aña”

den e ambiente di arte exquisite y di un forma excepcional manera cu nan merece.

Instituto di Cultura tambe ta contribui na e exposicion aki. E celebracion total di 45 aniversario di Mascaruba ta ser realiza den gran parti danki na UNOCA. Tambe nan ta

ricibi cooperacion di entre otro Setar, Tele Aruba y C&BM N.V.

Mascaruba ta spera cu celebrandonan 45 aniversario di e forma aki, nan ta duna Aruba un regalo di locual nan sa haci miho. Entretene y concientisa Aruba cu obranan cu ta trata topiconan cu ta significa hopi den nos comunidad. Mascaruba ta gradici e pueblo di Aruba pa nan apoyo durante 45 aña y ta spera cu nan por haci esaki pa 45 aña mas.